



partii naleraq

15.okt 2018

UKA2018/219

**Pinngitsuuisinnaajunnaarnermik katsorsaaneq pillugu Inatsisartut inatsisissaat nr. xx, xx.xxx 2018-imeersoq**

(Peqqissutsimut Ilisimatusanermullu Naalakkersuisoq)

Pinngitsuuisinnaajunnaarnermik katsorsaasaneq pillugu inatsisartut inatsisissaattut saaqummiussamut oqaasissagut saqqummiutissavagut.

Nunatsinni inuuniarnikkut atukkagut isigigaanni ajorluartumik naligiinngitsumiik atugaqarnerput malunnarluartarpoq, tamatumalu kingunerisarpaa ulluinnarni inuttut ajornartorsiutit aamma annertuut takussaalluarterat.

Kisianni aamma imaanngilaq inuttut atukkagut appasippata atonerluinissamut tamatigut qanittuararsuusugut. Takussarparpummi aamma inuit pissarissaaraluarlutik aamma atonerluisunngortartut, taamaattumik katsorsaanssamik anguniaqarluni saqqummiussaqaarneq tamakkiisumik tapersersugassaavoq.

Nunatsinni inuit sulisinnaasut tamaasa atorfissaqartippagut, ilami ukiuni makkunani sulisinnaasut ikiliartorput, aningaasalersugassagullu annertusiartorlutik. Taamaattumik immitsinnut pinngitsoorsinnaannginnerput tassuunaannarluunniit takusinnaavarput.

Pinngitsuuisinnaajunnaarnermik katsorsaaneq kisiat aamma tunngavigissallugu amigarpoq. Ulluinnarni avatangiisigut aamma ingerlaaserpullu nalilersorluagassaapput. Sunngiffimmi pinaveersaartitsinerit annertusaaffiginissaat aamma katsorsaaneruvoq sunniuteqartartorujussuaq.

Timersornikkut, peqatigiiffilerinikkut, nipilersornikkut, isiginnaartitsinikkut, meeqqanik inuusuttunillu aallussaqaqarlunikkut, periarfissat assut pitsanngorsartariaqarput aningaasalersuineq eqqarsaatigissagaanni aningaasalersuineq annikippallaartoq tamatta takusinnaavarput.

Taavalu inuttut ajornartorsiutigut tassalu pinngitsuuisinnaajunnaarnikkunik katsorsaaneq ingerlanniartarpoq ajunngilluinnartutut nalilerparput kisiannili taanna naammanngitsoq kisimi oqaatigisariaqarparput.

Innuttaaqaterpassugut ajorluartumik inissaaleqinermik annertuumik eqqugaanikuupput, ilarpassuagut inissaqaratik sumi tamaani angalaarput. Ilaqutariippasuit inigisaminnik aniatinneqartarput, meerarpassuit angerlarsimaffiup avataanut inissinneqarnikuupput, pissutsit tamakku atukkagut pitsaanerulersinngikutsigit taava akiuiniarneq qanoq sunniuteqartigissanersoq aamma takusinnaavarput taakkua katsorsaanerit kisiisa aallaavigiinnarlugit aaqqiisoqarsinnaanngitsoq.

Kommunit ilungersorlutik sulipput taakkualu aamma kisiisa tuppallersaatigissallugit amigarput, takusarpagummi kisimiillutik nukissaqarpallaarneq ajortut pingaartumik sulisussaminnik amigaateqartarnerat eqqarsaatigalugu.

Katsorsaanerit iluatsissappata taava katsorsakkat malinnaaffigeqqissaartariaqarput, aammalu avatangisaat pitsanngorsartariaqarlutik soorlu inissaaleqippata inissaanik ikiorlugit, meeqqaminnik arsaarneqarsimappata ilaqutaariit ataatsimut ikiorlugit aatsaat taamaliornikkut ilaqutariit aamma nukissaqarnerulissapput naammangilarmi meeraanik arsaaginnarlugit, imaluunniit inigisaannik anisinnarlugit.

Katsorsaaniaruttami ilaqutariinnik inunnillu ataasiakkaanik taava naqqaniit aallartinneqartariaqarput aammalu suliffissaqarnissaat ilinniarniassaat aalluttariaqarput imaangitsorli aamma pisussaaffiit kisiisa tunniussuunneqassasut. Eqqaasinneqartuartariaqarput aamma pisussaaffeqartariaqarmata inuiaqatigiit iluanni.

Suliniutit annertusarneqarnissaat tamakkiisumik tapersorsorparput, ilaqarpugummi ikiorserneqartussanik uaguallu inuiaqatigiinni aamma pisussaaffeqarput ilagut ikiussallugit.

Ikioqatigiinnermi uagut kalaallit anersaaraarput. Nuna manna pinngortitarlu peqarniitsoq inuuffigissallugu naleqqussarsimavugut. Ikioqatigiilluartarnitsigullu annattarsimavugut anersaarlu siulitta tunniussaata ikioqatigiinneq pisussaaffittut tigullugu ilagut ikiortariaqartut ikiussavagut pinngitsoorsinnaangilagummi.

Hans Enoksen